

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-1186/07
Sarajevo, 29.12.2007. godine

Z A P I S N I K

**5. VANREDNE SJEDNICE DOMA NARODA PARLAMENTA FEDERACIJE
BOSNE I HERCEGOVINE, održane 29. decembra 2007. godine**

Sjednica je počela u 10.40.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio delegate, premijera Federacije Nedžada Brankovića, zamjenike premijera Gavrila Grahovca i Vjekoslava Bevandu, ministre u Vladi Federacije Bosne i Hercegovine, goste, predstavnike sindikata, predstavnike Međunarodne zajednice i međunarodnih organizacija, kao i predstavnike akreditiranih medijskih kuća koji prate rad sjednice.

Odsustvo sa sjednice su opravdali: Zijad Tvica, Mika Lešić, Daliborka Milović i Tomo Vidović.

Na osnovu evidencije Stručne službe, predsjedavajući je konstatovao da sjednici prisustvuje 46 delegata, što čini većinu, te Dom naroda može raditi i punovažno odlučivati.

Prije utvrđivanja dnevnog reda predsjedavajući je predložio da se usvoje zapisnici 3. i 4. vanredne sjednice i Zapisnik 8. redovne sjednice sa primjedbama delegata Ive Komšića i Lidije Bradare, što su delegati prihvatili.

Na osnovu rezultata glasanja, predsjedavajući je konstatovao da su delegati, sa 49 glasova i bez primjedbi, usvojili Zapisnik 3. vanredne sjednice Doma naroda Parlamenta Federacije Bosne i Hercegovine, održane 30. novembra 2007. godine.

Na osnovu rezultata glasanja, predsjedavajući je konstatovao da su delegati, sa 49 glasova i bez primjedbi, usvojili Zapisnik 4. vanredne sjednice Doma naroda Parlamenta Federacije Bosne i Hercegovine, održane 12. decembra 2007. godine.

Na osnovu rezultata glasanja, predsjedavajući je konstatovao da su delegati, sa 48 glasova za i uz jedan uzdržani glas, usvojili, bez primjedbi, Zapisnik 8. sjednice Doma naroda Parlamenta Federacije Bosne i Hercegovine, održane 08. novembra 2007. godine.

Predsjedavajući je podsjetio delegate da je Vlada Federacije Bosne i Hercegovine dostavila Prijedlog Budžeta Federacije Bosne i Hercegovine za 2008. godinu i Prijedlog Zakona o izvršavanju Budžeta Federacije Bosne i Hercegovine za 2008. godinu sa prijedlogom da se razmatraju po hitnom postupku.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 48 glasova za i uz jedan glas protiv, prihvatio da se Prijedlog Budžeta Federacije Bosne i Hercegovine za 2008. godinu razmatra po hitnom postupku.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 48 glasova za i uz jedan glas protiv, prihvatio da se Prijedlog Zakona o izvršavanju Budžeta Federacije Bosne i Hercegovine za 2008. godinu razmatra po hitnom postupku.

S obzirom na to da nije bilo prijedloga za izmjenu i dopunu predloženog dnevnog reda, predsjedavajući je konstatovao da je Dom naroda Parlamenta Federacije Bosne i Hercegovine jednoglasno usvojio sljedeći:

D N E V N I R E D

1. Prijedlog Budžeta Federacije Bosne i Hercegovine za 2008. godinu – hitni postupak,
2. Prijedlog Zakona o izvršavanju Budžeta Federacije Bosne i Hercegovine za 2008. godinu – hitni postupak,
3. Prijedlog Zakona o porezu na dobit.

1. Prijedlog Budžeta Federacije Bosne i Hercegovine za 2008. godinu

Prijedlog Budžeta Federacije Bosne i Hercegovine za 2008. godinu dostavila je Vlada Federacije.

Uz Prijedlog Budžeta dostavljeni su i:

- Plan razvojnih projekata u Federaciji Bosne i Hercegovine za 2008. godinu,
- Finansijski plan Zavoda zdravstvenog osiguranja i reosiguranja Federacije Bosne i Hercegovine za 2008. godinu,
- Finansijski plan Federalnog zavoda za zapošljavanje za 2008. godinu i procjena plana za 2009. i 2010. godinu i
- Finansijski plan Federalnog zavoda za penzijsko i invalidsko osiguranje za 2008. godinu.

Predstavnički dom je na 11. vanrednoj sjednici, održanoj 28. decembra 2007. godine, usvojio Prijedlog Budžeta Federacije Bosne i Hercegovine za 2008. godinu sa finansijskim planovima vanbudžetskih fondova uz dvije tehničke ispravke koje je dao federalni ministar finansija.

Prijedlog Budžeta su razmatrala nadležna radna tijela i dostavila svoje izvještaje.

Na Prijedlog Budžeta amandmane su podnijeli: Klub delegata srpskog naroda – tri amandmana, Odbor za poljoprivredu, vodoprivredu i šumarstvo -

dva amandmana, Mira Ljubijankić - jedan amandman i Muhamed Osmić - jedan amandman.

Prijedlog Budžeta obrazložili su premijer Nedžad Branković i federalni ministar finansija Vjekoslav Bevanda, koji je obavijestio delegate da su se u Prijedlogu Budžeta izvršile dvije **tehničke ispravke**, koje je usvojio Predstavnički dom i to:

- da se pozicija koja se odnosi na Grant za finansiranje odašiljača i tehnike Hercegovačke televizije briše, a da se ta sredstva prebace na Tekuću rezervu Vlade Federacije;
- Transfer za sufinansiranje Fondacije za održivi razvoj «Odras» se sa ekonomskog koda Federalnog ministarstva prostornog uređenja prebacuje na ekonomski kod Federalnog ministarstva finansija.

U pretresu su učestvovali: Zoran Budimić, predsjednik Odbora za poljoprivredu, vodoprivredu i šumarstvo, Mira Ljubijankić, predsjednica Kluba delegata srpskog naroda, Saša Magazinović, Jasenko Tufekčić, predsjednik Kluba delegata bošnjačkog naroda, Drago Puzigaća, Josip Perić, predsjednik Kluba delegata hrvatskog naroda, Besim Imamović, Sead Čaušević, premijer Nedžad Branković, Asim Mekić, Slobodan Rodić, Svetozar Pudarić, Fahrudin Skopljak i federalni ministar finansija Vjekoslav Bevanda.

Premijer Nedžad Branković je predložio da se obavi pretres i o drugoj tački dnevnog reda, a da se nakon toga napravi pauza kako bi se Vlada Federacije izjasnila o podnesenim amandmanima, što je podržao i predsjedavajući Doma naroda. Ovaj prijedlog delegati su prihvatili.

2. Prijedlog Zakona o izvršavanju Budžeta Federacije Bosne i Hercegovine za 2008. godinu

Prijedlog Zakona o izvršavanju Budžeta Federacije Bosne i Hercegovine za 2008. godinu dostavila je Vlada Federacije.

Predstavnički dom je na 11. vanrednoj sjednici, održanoj 28. decembra 2007. godine, usvojio Prijedlog Zakona o izvršavanju Budžeta Federacije Bosne i Hercegovine za 2008. godinu sa amandmanom na član 29. Prijedloga Zakona, koji je Vlada Federacije prihvatila, pa je postao sastavni dio Prijedloga Zakona.

Amandman

U članu 29. st. 2. i 3. mijenjaju se i glase:

"Sredstva namijenjena za finansiranje političkih subjekata Vlada će rasporediti tako da 30% od predviđenog iznosa rasporedi na političke subjekte koji su zastupljeni u Parlamentu Federacije Bosne i Hercegovine u jednakim iznosima, a 70% prema broju zastupnika u domovima Parlamenta.

Koalicija je politički subjekt za raspodjelu ovih sredstava samo ako postoji ugovor za raspodjelu novčanih sredstava između članica koalicije koji je deponovan u Centralnoj izbornoj komisiji, te Vlada sredstva koalicije raspoređuje na osnovu odredbi takvog ugovora."

Stav 4. se briše.
 Dosadašnji stav 5. postaje stav 4.

Prijedlog Zakona razmatrala su nadležna radna tijela i dostavila svoje izvještaje.

Na Prijedlog Zakona jedan amandman je podnio Sead Čaušević.

Prijedlog Zakona je obrazložio federalni ministar finansija Vjekoslav Bevanda.

U pretresu su učestvovali: Ivo Komšić, Muhamed Osmić, Mislav Sučić, Sead Čaušević, Denis Zvizdić i Asim Kamber.

Nakon zaključenog pretresa predsjedavajući je dao pauzu.

* * *

Nakon pauze, premijer Nedžad Branković se, u ime Vlade Federacije, izjašnjavao o podnesenim amandmanima na Prijedlog Budžeta i Prijedlog Zakona o izvršavanju Budžeta.

1. Prijedlog Budžeta Federacije Bosne i Hercegovine za 2008. godinu

S obzirom na to da je premijer Nedžad Branković izjavio da ne prihvata podnesene amandmane, predsjedavajući je pozvao podnosiocima amandmana da se izjasne da li ostaju pri podnesenim amandmanima.

Muhamed Osmić je odustao od svog amandmana.

Zoran Budimić je, u ime Odbora za poljoprivredu, vodoprivredu i šumarstvo, izjavio da će Odbor povući amandmane, ali da se umjesto njih usvoje zaključci, koje je pročitao.

Jasenko Tufekčić je, u ime Kluba delegata bošnjačkog naroda, takođe predložio zaključak koji je pročitao.

Mira Ljubijankić je, u ime Kluba delegata srpskog naroda, odustala od amandmana jer je federalni ministar raseljenih lica i izbjeglica Edin Mušić izjavio da će se projekti spomenuti u amandmanima realizirati u toku 2008. godine. Također je zatražila da zaključak koji je premijer predložio prilikom izjašnjavanja o amandmanima Kluba delegata srpskog naroda bude zaključak Doma naroda. Izjavila je da ne odustaje od svog amandmana i zatražila je da se o njemu glasa.

Predsjedavajući je nakon glasanja konstatovao da amandman nije dobio potrebnu većinu glasova.

Nakon toga predsjedavajući je prešao na glasanje o Prijedlogu Budžeta.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova za, uz devet glasova protiv i uz jedan uzdržani glas, usvojio Prijedlog Budžeta Federacije Bosne i Hercegovine za 2008. godinu sa finansijskim planovima vanbudžetskih fondova.

Tom prilikom Dom naroda je usvojio i sljedeće:

ZAKLJUČKE

1. Obavezuje se Vlada Federacije Bosne i Hercegovine, odnosno resorna ministarstva da budu nosioci i koordinatori inicijative za realiziranje programa i projekata koje je dostavio Klub delegata srpskog naroda u dijelu u kojem je Vlada Federacije Bosne i Hercegovine nadležna za te programe i projekte, te da pokrenu inicijativu prema državnoj komisiji koja se bavi finansiranjem ovih projekata i programa.
2. Obavezuje se Vlada Federacije Bosne i Hercegovine da u eventualnom rebalansu Budžeta Federacije Bosne i Hercegovine za 2008. godinu izdvoji dio dodatnih sredstava za podsticaje u primarnoj poljoprivrednoj proizvodnji.
3. Obavezuju se premijer i Vlada Federacije Bosne i Hercegovine da tokom 2008. godine iz Tekuće rezerve premijera izdvoje dio sredstava za Transfer za veterinarstvo.
4. Obavezuje se Vlada Federacije Bosne i Hercegovine da do 31. januara 2008. godine utvrdi kriterije za raspodjelu budžetskih sredstava nižim nivoima vlasti i sačini izvještaj o utrošku tih sredstava.

Nakon toga premijer Nedžad Branković zahvalio je delegatima na izglasanom Budžetu Federacije BiH za 2008. godinu.

2. Prijedlog Zakona o izvršavanju Budžeta Federacije Bosne i Hercegovine za 2008. godinu

Predsjedavajući je podsjetio delegate da je Sead Čaušević podnio amandman, koji Vlada Federacije nije prihvatila.

S obzirom na to da Sead Čaušević nije odustao od amandmana, predsjedavajući ga je dao na glasanje i, na osnovu rezultata glasanja, konstatovao da amandman nije dobio potrebnu većinu glasova.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova za, uz osam glasova protiv i uz dva uzdržana glasa, usvojio Prijedlog Zakona o izvršavanju Budžeta Federacije Bosne i Hercegovine za 2008. godinu.

3. Prijedlog Zakona o porezu na dobit

Prijedlog Zakona utvrdila je Vlada Federacije.

Predstavnički dom je na 11. vanrednoj sjednici, održanoj 28. decembra 2007. godine, usvojio Prijedlog Zakona o porezu na dobit sa amandmanom na član 62. Prijedloga Zakona, koji je podnijela Vlada Federacije, pa je postao sastavni dio Prijedloga Zakona.

Amandman

U članu 62. riječ "osmog" zamjenjuje se riječju "narednog" a riječi: "a primjenjivat će se od 01.01.2008. godine" se brišu.

Prijedlog Zakona razmatrala su nadležna radna tijela i dostavila svoje izvještaje.

Na Prijedlog Zakona jedan amandman je podnio Svetozar Pudarić.

Prijedlog Zakona je obrazložio federalni ministar finansija Vjekoslav Bevanda.

U pretresu su učestvovali: Svetozar Pudarić, Ivo Komšić i premijer Nedžad Branković koji je izjavio da ne prihvata amandman Svetozara Pudarića.

S obzirom na to da Svetozar Pudarić nije odustao od podnesenog amandmana, predsjedavajući ga je stavio na glasanje i konstatovao da amandman nije dobio potrebnu većinu glasova, jer je za njega glasalo sedam delegata, 17 delegata je bilo protiv, a 22 delegata je bilo uzdržano.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 44 glasa za i uz tri uzdržana glasa, usvojio Prijedlog Zakona o porezu na dobit.

* * *

Sjednica je završena u 15.30.

Transkript sa sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆI

Stjepan Krešić